



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

Introduction à la vie de nostre Seigneur Iesus Christ.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

minus laudat

INTRODVCTION A LA VIE DE NOSTRE SEIGNEVR IESVS-CHRIST.



OVR ainsi comme nostre Redempteur Iesus-Christ est la fontaine & le tige de toute sainteté, & ce Soleil de iustice, qui par ses rayôs lumineux cause toute la clarté qui est en s^o Eglise, de mesme sa vie, sa passion & mort tres-beniste, sont les moyens par lesquels il nous communique & influé ceste mesme sainteté. Dieu se fit homme, & vescu parmi les hommes reuestu d'ame & de corps, pour nous enseigner à viure vne vie n^o humaine, mais diuine: non de la terre, mais du Ciel: il endura tât de douleurs & vne si ignominieuse mort, pour captiuer de tant plus nostre cœur, & nous lier de plus estroites chaines d'amour. De maniere que la vie de nostre Seigneur est vn moule & vn patron de la vie du Chrestien: & la sacree passion est nostre richesse, & le thresor de nos merites, c'est nostre lumiere, nostre medecine, nostre sâté, nostre vie, nostre gloire & b^o-heur. Voilapourquoy nous ne deuons rien auoir tant à main de iour, & nuict, ny mediter & ruminer si souuēt, que la vie & la mort de nostre Sauueur & Redempteur, pour imiter ses vertus, & redresser nos sentiers obliques avec la reigle, & le niueau de sa droiture. Car comme dit saint Gregoire, toutes les actiôs de nostre Seigneur sont l'instruction & enseignement de ce que deuons faire: & celuy-là, est plus saint & plus parfait qui sçait mieux imiter les vertus & exemples de Iesus-Christ; parce qu'il boit plus abondamment en la fontaine, & participe d'auantage de la vertu & humeur de la racine, & de l'influxion de son chef: & est mieux couuert & resplendissant de la lumiere de ce Soleil, lequel est la cause de toute la Iustice & clarté. C'est pourquoy saint Paul nous exhorte de l'imiter, & en donne la raison, par ce qu'il imitoit Iesus-Christ. Et pour ceste mesme cause, plusieurs Saints, & hommes de grande perfection ont pris pour matiere de leur oraison & meditation, la vie & passio de nostre Seigneur, d'autât qu'ils y trouuoient la nourriture de leurs ames, la medecine de leurs maladies, le reconfort de leur foiblesse, les aiguillons d'amour en leur tepidité, pardô à leurs pechez, guarisô à leurs playes, & le remede à toutes leurs necessitez: iusques là, qu'aucuns grâds seruiteurs de Dieu, en l'agonie de la mort, se faisoient lire de mot à autre la passion de nostre Sauueur, pour la représenter au

Pere eternel, & s'encourager par la memoire de ce qu'il a souffert pour nous, pour confondre & espouuenter le diable, qui fut vaincu par icelle, lequel procure en ceste heure plus qu'en toute autre, de nous faire perdre le fruiet du precieux sang de nostre Seigneur. C'est ce qui m'a couié, Lecteur benin, à mettre au commencement de la vie des Saints, la vie du Saint des Ss. & la cause de toute la sainteté qui est en tous les Saints du Ciel, & de la terre. Et d'autant que plusieurs ont escrit la vie de nostre Sauueur Iesus-Christ, & les mysteres sacrez (encore que tout ce qui s'en peut dire soit fort peu) & quelques auteurs les ont estendus avec des consideratiôs pieuses, illustrees de leur beau stile & eloquence, pour imiter les Lecteurs de les mediter avec plus grand profit & vtilité, ce n'a pas esté mon intention de faire longs discours, ains de rapporter toutes les choses qui m'ont semblé plus remarquables de la vie & passion de nostre Seigneur, les narrant nuëment & simplement, afin que le Lecteur sçache la verité de l'histoire, & y fonde ses conceptions, forme ses saintes considerations, & en edifie son ame. D'autant que ceste façon d'escire est plus vtile & profitable pour le simple peuple, qui n'a pas de lettres: soit parce qu'il n'est pas capable de tant de delicates sentences, de la multitude desquelles il demeure tout esblouy, & l'entendement offusqué: soit par ce qu'il gouste dauantage & empraint plus auant en son ame ce qu'il conçoit, & que Dieu luy communique en l'oraison, touchant les diuins mysteres de sa vie & passion, que ce qu'il lit en d'autres auteurs, quoy que ce soit chose beaucoup plus haute & excellente. Il est vray qu'afin que le Lecteur le puisse mieux faire, & que l'histoire ne soit trop nuë, n^o luy auôs ouuert le chemin en d'aucuns passages, & luy donnons des motifs pour la meditation des mesmes mysteres, respendant en ceste histoire toute pleine & simple, la semence, laquelle estant semee en son cœur par l'oraison, rapportera en son temps beaucoup de fruit. C'est de quoy ie vous ay voulu auiser, Lecteur Chrestien, afin que vous sçachiez la cause qui m'a meu à mettre icy la vie de Iesus-Christ, & l'escire c^ome l'ay fait, lequel nous veuille donner par sa misericorde la grace de l'imiter en sorte, que nous meritions iouir du fruiet incestimable de sa Croix, & tres-saincte Passion.